

四庫全書

集部

欽定四庫全書

皇甫司勳集卷二十

明 皇甫汈 撰

五言律詩

初至京同諸進士集羅山人館探韻各賦得東字
十年遼冀北一壑卧江東歸去同元亮重來藉子公鶯
花新漢月燕麥舊春風祇自持團扇慙恩女伴中
諸君乘月攜酒見過遲謝山人不至席上作

芳樹長安道春宵動旅愁一尊良讌會四海盡交遊玉
漏寒頻度金河靜不流清輝憐謝監何事隔南樓

經司直兄故居

平原寓東洛參佐接西鄰履跡都埋草琴臺尚網塵徂
年同過客華屋屬何人獨有空梁燕飛來攪暮春

題張子言故居

未果逃人世居然託帝城一區留敝宅千古謝浮名枯
樹昏鴉集頽墻蔓草生空餘四愁在誰復擬張平

見月懷鄉

巖居遙對月時復望長安一作西京客翻憐故國看關
山經戰後烏鵲遠枝殘多少幽閨恨刀頭欲問難

子約弟調官因寄

同是冥飛羽俱為世網牽金無漢廷譽玉有楚人憐興
減彈冠日情違襍被年何如賦歸去偕隱密山前

上巳日同友人集大寧寺得幽字

帝里冠裳集禪堂禊事修人天春駐景花竹暝通幽香

積開芳宴金河引曲流誰云王逸少陳迹獨千秋

首夏集姚令園亭分得君字

會有幽棲地能招好事羣草芳殊未歇鳥語更相聞掃
徑花飛雨留關竹護雲無須謝車騎心遠為徵君

過廣平懷吳二純叔

爾昔承麾日余茲趨府情棠陰覆聽事苔石見題名夢
裏叢臺月愁中漳水聲何如窓岫色能憶謝宣城

登廣平借寇樓寄體乾于浙省

同是皇畿宰回驚二十秋人隨台嶽迴年逐滄河流月
黯琴疑在花深鳥詎留寇恂那可借日暮倚高樓

贈晁翰檢在告

金馬沈方朔文園卧長卿何如狎鷗鳥暫此返柴荆草
就編年目花餘愛日情庭闈自可戀詎是厭承明

寄子約弟

兩地承嚴竄同時罷省郎因書問舟楫何日下沅湘客
夢頻棲月征途欲戒霜平生題賦意那得倦遊梁

秋夜集李守衙齋

政閒庭每寂吏散日猶曛下榻生秋思傳杯語夜分
暗花微泣露纖月淨開雲失路聊相倚何期御李君

生朝寄兄弟

白髮逢初度清尊思惘然鵲鷦原上夢犬馬客中年
眉宇將雲結心旌共月懸朝來淇水望時問渡淮船

從事河上

昔官淹水部茲役媿飄蓬散帙觀周傳尋源念禹功
荒

城下寒日落葉送秋風獨有逍遙意將從河上公

簡長垣劉尹

獨坐臨流處彈琴最憶君降霜花發候落日鴈來羣
縣外夷門路齋中少室雲裁詩寄劉尹佳政欲相聞

訪同年葉給舍

北闕因言政東莊早拂衣人從泗水別書到廣川
稀素業存荒徑清宵夢鎖闌相逢惟勸飲世事已俱非

邯鄲道

邯鄲臨古道車馬此通津錦瑟空埋恨緇衣易染塵王
昌非蕩子趙女是才人併逐漳流盡荒臺蔓草春

呂公祠

金榜標新界琳宮接舊城暮扉煙樹紫春水石橋清遺
寢仙翁蹟崇祠聖主情塵勞俱夢客非止一盧生

懷沈二儀曹

地重留司後官清建禮初江間堪吏隱天外惜離居草
合春迴騎冰開日望魚西京訪遺事還擬賦憑虛

永嘉登江心寺

雙塔峙琳宮諸天一水中
迴看雲島合直與海門通
荒寢憐文相高樓憶謝公
潮聲無日夜流恨古今同

題卻金館

茲山有崇構本自薄黃金
荒草空成昔清風猶在今
鋤揮曾不顧裘敝亦何心
願得無相贈逃名寄已深

臘月晦日酌酒贈王生一龍

湖海逢除夕衙齋戀故陰
感時行路歎落日倚門心
竹

葉傾難盡椒花坐已深
南州留榻在且莫賦歸吟

訪周氏舊司勳

隱居南郭裏秋色越江前
道訪鴻蒙後名聞畫省先
示人惟杜德守已只雙玄
一謝金門路寧如玉蕊年

天寧寺遷內樞

翠翼辭官舍靈筵啟梵宮
香銷灰劫後淚盡雨花中
棲處知魂寂歸時悟色空
一從羅帳冷不敢問春風

方山人別我括蒼今會于殊勝寺

官舍春懸榻僧齋夜落帷暫來休汝日一為訪君時望
裏分鄉樹愁中惜鬢絲不知何戒律可以斷歸思

早春寄子約弟余方有悼亡之戚

獻歲思吾弟何時報徙官夢勞池上積書到洛中看太
史身猶滯潘生淚未乾梁園飛雪盡欲下剡溪難

子陵祠

問水下桐津看山入富春花源別是路魚鳥自為鄰獨
作垂竿客多慙薦藻人滄波流不盡何以溯芳塵

崇道觀登試劍石同龔溫州

采秀臨丹壑攀蘿踐白雲仙源那可測巨石已中分
劍化靈猶在爐寒火自焚今宵看斗氣一為問夫君

晚登棲霞寺

在青田縣南

野寺投鐘暮禪燈隔水明來尋種芝處但見桃花生
絕頂圍青嶂彌天遍赤城坐談空色理徒有駐顏情

馮公嶺經桃花隘

辨壤猶通會分途稍入甌凌空惟仄徑界道有飛流
山

鳥看明滅關雞問阻脩因懷簡書畏曾是不遑留

石門

洞門紆逕引飛瀑半空聞掛壁常看雪開窓但弄雲帆
輕過鳥疾衣冷落花紛何事淹歸馭清暉戀謝君

白雲山

青山行處盡始覺白雲深錫化無僧在鐘鳴有客尋花
溪遙隱壑蘿逕曲通林坐得浮生理悠然忘我心

三巖洞

峭石何年斷飛泉竟日聞虛堂秋易入晴樹雨難分夜
似觀廬瀑朝疑帶楚雲坐深羅袖冷猶自戀氤氲

送王亮卿遊天台

嶽路從茲始仙源信可求客情臨海嶠鄉語永嘉舟天
外看霞起林間聽瀑流無能解纓去送子欲神遊

答吳二純叔

江城一別後已是隔年春棄置同遺跡相逢但愴神塵
因淹宦減鬢以悼亡新徒奉平原藻嗟無可贈人

五日松江道中

積水雲間杳輕帆雨後孤紅巾橫道路白髮滯江湖客
夢遙驚鶴鄉心欲問鱸干戈正滿眼空對辟兵符

秦駐山

萬乘留秦蹕千秋紀越山水從溟海外雲自會稽間草
樹迴窮髮魚龍候聖顏不知徐市去靈藥幾時還

海鹽勛事訪王世廉不值

荒城罷兵火溟海尚波瀾詎意徵君里俱為暴客殘短

書無自達長缺倚誰彈始悟平吳易空嗟得俊難

萬象山崇福寺

蓮城最高處蘭若此中開水見東溪去僧聞西域來啼
鳥喧梵座花雨淨經臺觀萬俱空境何須得象回

縉雲尋唐陽水吏隱山贈李方伯

隱吏久不作青山名已虛窪尊花下蹟科斗竹間書沉
飲非妨政耽遊為惜餘藩侯寔宗彥曠代此懸車

東溪寺

源自大
盤山

東溪斜帶郭數里接仙源嵐氣迴盤嶺灘聲到石門僧
開翠微舍客造白雲軒訝可無機事看鷗代晤言

九日寄子約

時海寇甫戢
聞河中盜起

漫有登高處兼當遠望何對花驚白髮見鴈憶黃河亂
後書來少霜前木落多不堪羈宦日同是阻干戈

送客之濟上訪金君舊吳守

臨淄路何許之子謁賢侯昔受千金顧今懷一飯酬刺
修緣北海榻解為南州若問長洲苑傷心荒草秋

贈王生

維楨
仲子

世業本青箱
說說後益昌
談應呼小友
書已授中郎
鵬路瞻霄近
鷄窓惜晝長
阿翁雖善賦
輟草待靈光

訪萬師寺居

行營辭細柳
開府寄東林
對塔占雲氣
安禪就樹陰
輕身驅白馬
收士散黃金
何自除煩惱
澄公誦法深

別我兄弟之滇中

少年迷善宦
中歲尚投荒
同氣分花萼
驚飛折鴈行
蒼

山官舍近炎海客途長莫漫愁烽火音書早寄將

贈黃梅令張九一新蔡人也

解褐趨朝日腰章宰邑年人同潘岳少政並子奇賢楚
地從茲始梁園若箇邊更聞兩峯勝政暇一逃禪

邑有四祖

五祖山

登赤壁

萬古滄江上清秋赤壁開浴鳧知舊渚橫鶴見新臺妙
齒瑜非昔雄心操已灰媿無題賦手猶欲記重來

己亥歲余

謫黃理官嘗遊赤壁擬蘇長公製賦一首越甲寅余有
滇南之役道復經此欲撰後賦征遠未暇脚占短律

巢縣

昔覽先公傳常懷高士名今來洗耳處益感讓皇情郭
外箕山色林間潁水聲能令車馬客延佇媿塵纓

重經四祖五祖山

慧宇接巖阿塵鑣惜再過鄉書吳鴈盡客淚楚猿多鐘
梵凝青靄鉢衣掛碧蘿那堪彈指後年鬢已蹉跎

清平九日

重陽頻作客萬里動離思況此牂牁路兼之風雨時孟
生高興盡陶令去來遲霜後猶無鴈攀花欲寄誰

寄所親

故國吳關外遙心楚水東九秋日易盡萬壑路難窮民
俗非夷舊人言與蜀通因書報親串行始達黔中

關索嶺

斲石微通路攢峯儼作關雲中馬嘶去天上鳥飛還水
向盤江匯坡從香樹攀平生慣履險於此亦摧顏

香樹坡名

顧叅軍於板橋驛贈別寄憶

昔感驪駒賦辭君金馬關河橋相送處猿月共荒山烽
火猶傳警田園未遂還梁溪如借問芳草夢魂閒

早春五華寺

淑氣南中早春遊上界清寺緣雙樹建山識五華名積
霧鄰滄海餘霞似赤城沉灰如可辨浩劫在昆明

圓通寺

緇流棲梵處不與俗情諧花雨藏春逕松風掃夜階欲

觀一切法來叩八關齋漸覺忘言好探遊媿詠懷

馬跑泉

漢將長驅日黔關夜度年千盤鷄背險百折馬蹄穿梅
盡難銷渴河乾不受錢從來踈勒外知有耿恭泉

溫泉

靈泉瀉溫液灼水沸華池煦沫看流處涼風來浣時花

凝百和氣樹偃萬年枝詎說驪山上痾銷神女祠

泉上有無

名樹四時不凋升菴詩
云瑶草燭千歲是也

曹溪寺

寺有泉源一日
三至名聖水云

鷲嶺知何處
螳川去不遙
仙巖鐘夜月
聖水梵時潮
浴罷衣聊振
風停幡屢飄
遠公一相謝
乘醉下溪橋

邀李憲長同李侍御登海上浩然閣夕泛建閣賦
詩者吳姜公龍也閣與詩皆無恙而姜為異物
矣因次其韻繼之以慨焉

高閣與雲浮
平看洱水流
相邀二嘉客
來泛一仙舟
烽火堪愁思
煙波幾浪遊
望鄉因歎逝
陳跡已先秋

宿太華山寺

昆明積水上特秀太華峰寺遠雲間塔山深午後鐘庭
花間自落海鳥偶相從一就松齋宿晨關報已慵

宿太華寄答周子

移文謝周子余在草堂眠竹徑雲初合薇軒月自懸秋
光涵一水夜雨淨諸天即境雖云異看心共是禪

訪周子籲小酌水木軒

愛爾官齋裏居然隱者同遠山當戶入瀑水隔溪通蔓

草牽風碧薇花墜雨紅故園經亂後翻不似南中

夢子安兄作

一為生死別獨宦尚飄蓬白首行荒外青山值亂中
九原人豈作萬里夢猶通今夜看春草池塘思不同

九日寄子約

三吳猶轉戰萬里共含愁
苒蕙蠻中老茱萸海上秋懷
仙入靈境為政見風流
自媿投荒者何時逐少游

得王南安書并詩因寄

越鳥一相失同時別會稽忽傳千里札因奉八行題庾
嶺看天末章江帶郡西新詩仍自好名媿四生齊

滇省監試武士

鎖院此重開登壇屬異才花非桂子落月似柳營來漢
業銅標在邊塵鐵騎催行看投筆去竚爾勒銘回

送陳水部還朝

奉使來金馬徵錢助水衡歸程望閭闔別酒餞昆明歲
序看湘鴈春心報省鶯因君問鄉土何日海波平

滇南雪後

閏月凝寒早，炎方見雪稀。
六花金馬上一似玉關飛。
素積昆池練，晴連華岳暉。
吳兵猶挾纊，未報解征衣。

送董道夫還大梁

歸心年不待，高蹈古來聞。
牽世俱為客，辭官獨見君。
到家春草合，度嶺瘴煙分。
去去嵩山迴，何由係白雲。

萬憲使招遊龍華寺寺臨交水而萬江州人也

城陰尋古寺，日午報鐘聲。
豸服防僧避，龍華護法明。
雪

殘雙樹冷溪抱二流清為問廬山客何如入社情

遊清溪洞

洞壑何年闢緣溪五里間探奇披瘴入眺險拂雲攀泉
暗惟聞響花深不記還始知窮海外別自有名山

青華洞

暫輟臺中鞅來尋洞口春壑幽經窈窕石怪訝嶙峋氣
潤常含雨明通不受塵鑿空非漢使到此定迷人

歲暮齋中作

一作南荒客常懷東海思流芳忽改歲尸素已多時薄
俸僧堪施閒心吏豈知朝來華山爽聊復對支頤

為張含追悼少君二首聞遺孩孝慧云

舊事徵彤管新詩哭總帷一朝謝膏沐誰復嗣音徽入
室看遺桂臨堂問卷衣世人無李少空望彩雲飛
埋玉嗟之子寧馨有令兒多應憐鳳羽非止為蛾眉夜
壑長留恨春風祇益悲名香產西域不驗返魂時

始發滇中

荒外倦遊日南中歸去情春心同社燕旅跡任江萍自
恨拂衣晚誰云脫屣輕獨憐山太宰門下絕嵇生

貴陽阻雨

農家正喜雨客路不堪愁白馬吳門遠商羊楚水流眉
隨朝靄結心待夕雲收余亦歸田者山中幸有秋

郝憲使招宴岳陽樓

高閣倚清虛長川落照餘從來風景處能使興情舒垂
翼同歸鳥冥心不羨魚因君念傾蓋聊此駐征車

過蒲圻弔廖學士

碧山成葬地華屋但荒居衆女爭相妬明君恨不如甘泉無獻賦鄴架有藏書獨惜招魂處湘江夜月虛

潛山五日卜尹惠酒

故國兵戈日長途風雨時忽驚芳草歇猶恨及瓜遲仙令迴雙鳥良辰贈五絲朝來皖山樹渾繫隔江思

皇甫司勳集卷二十

欽定四庫全書

集部

皇甫司勳集卷二十一至

詳校官監察御史臣曹坦

中書_臣劉源溥覆勘

總校官進士_臣朱鈐

校對官編修_臣沈清藻

膳錄監生_臣許思光

欽定四庫全書

皇甫司勳集卷二十一

明 皇甫汈 撰

五言律詩

解官歸奉答子浚兄

早歲從羈宦終年辭密親
長羅謝逋客芳草遲歸人
廬幸存先散家徒減仲貧
故園華萼在何必日南春

答子約弟

出處本無定分飛任所之如何掛冠日況是阻兵時宦
惜潘生拙歸嫌陶令遲北風待高翼莫學守南枝

答陸子

投劾謝當路因書報隱君從茲返初服聊得慰離羣棹
處汀洲月耕時洞口雲北山期共入那復待移文

過張子新居

早學樊生圃初歸平子田蕉陰清簟上花氣綠窓前客
每攜樽往予思借榻眠墻東喜相接無用買鄰錢

酬子約秋日齋中讌集

憐君暫休汝留客賦郊居
琴興聞蟬後秋聲落水初
白雲間北牖芳草歇前除
即序方盈念貧交已漸疎

重挽周以言二首

委化同桑戶嗟來弔寢門
迷途非敏夢顧影似愁魂
總帳風偏瑟松丘日易昏
平生金藥秘無復枕中存
把臂成淹忽傷心每泣然
笛聞堪有賦琴在已亡絃
訪宅為幽里尋溪是夜川
襄陽多棄草何處購遺篇

答黃志淳

憶爾因兵火攜家住石城
嗟余解纓絡稅駕返柴荆
夢裏秦淮遠愁中歲月更
如何書寄語猶是未歸情

送唐應德遊武夷

那堪逢亂後重此對離羣
歲晚崇江道天長幔嶺雲
靈魚尋漢祀仙掌謁夷君
獨往清溪夜啼猿幾處聞

題屈氏廢居

海上逢殘寇山中憶敝廬
可憐虞仲里誰卜屈平居
棟

沒秦灰後臺傾蔓草餘秋螢飛不散猶似照遺書

送陸子還西山

湖山招隱地歲晚獨歸人寇亂惟衰鬢途窮共此身門
閑嵇散釣甌滿范生塵別後毛壇路花溪夢裏春

冬宵東子約

曼容歸念早逸少官情闌詎是淮陽薄其如蜀道難長
林扉獨掩永夜榻同寒為謝閩中使江臯歲已殫

哭姪阿乘三首

生期嗣芳軌奄忽撫靈車竹下銜杯盡苔前望履虛膏
帷初息照塵榻尚留書魂去依長夜心傷十起餘

夙齡稱獨秀弱質竟罹災一旦隨朝露千秋閔夜臺為
山成復止逝水去無回始悟蘭芳促何應壽不材

長魚疲侍疾季琰妙通禪毀性安疎節無生得大年松
邱成異代花徑隔重泉一見西河泣誰能不泫然

登天平廢寺

古寺空山裏重來感廢興尋谿迷蔓草攀壑藉危藤遠

樹多寒鵲燃燈止病僧獨憐青嶂外猶見白雲層

錢侍御賻亡友周子儒於虞山感賦

嗟君成物化何事得仙游
術向青華秘名從綠簡收
空棺存敝杖藥市即丹丘
柱史生前契靈筵永夜留

四月八日讚佛

四禪開孟月八解應芳辰
香梵迎祥蓋燈筵候法輪
觀空成彼岸戒寂示來津
髣髴金光裏如來此現身

四月十四仙誕日因憶以言

令節啓朱明羣仙降太清
冀猶虧一葉芝已秀三莖磨
鏡非凡迹懸壺豈世情
不知塵市裏何處覓周生

頌藥師燈

洹碣留真諦維摩習病禪
欲除諸障染聊示一燈燃
生滅俱成幻光明即是緣
蓮花如有悟何必待薪傳

詠扇

吳繭新傳製齊紈舊得名
塵來聊障面歌罷尚持情
學月何曾滿懷風不奈輕
莫須逢內史價始重稽城

坐忽春暮擬結山遊簡我兄弟二首

春芳餘復幾塵戀苦相仍負杖才堪起單衣已自勝溪
留花共入山待月同登欲往招公子無言病未能

長兄
病初

愈

聞君閉關處趺坐學維摩春色遙相待流芳惜易過逢
鷗機事少攀樹隱情多不稅東山駕投簪意若何

姪秦宅觀玉蘭

玉樹傳吳產幽枝異楚叢競芳春色裏留賞夕陽中弱

質全矜素繁妝最妬紅
況逢佳子姪不忝謝家風

子約日耽內典因贈

積雨淹幽徑高雲翳遠峰
披經詮范績就佛禮何顒華
悴觀朝槿清虛鳴夜蛩
非緣禪悟早那使宦情慵

寄雲谷上人

棲霞信靈境滅跡企前規
松覆梁王宇苔荒江總碑
鱸歸秋興後猿定夜禪時
怨別心千里惟應江水知

夏日吳橋見訪

逃暑掩柴關清風喜乍攀噫歌出嵩洛招隱入湖山
離亂空凋鬢窮愁為損顏梁王方好客何事倦遊還

悼甥吳彥先家在吳江曾隨余括州別後竟逝云
獨行嗟難合玄思惜未成泉幽流壑恨楓冷咽江聲
鵲結那堪檢螢飛更不明向來臨渚淚何自對韓生

賦得郊臺送張子讀書楞伽寺

高臺臨水曲吳國此郊裡輦路名猶在壇柴事已塵
那知薦壁處空對下惟人欲賦興亡恨愁看芳草春

哭兄詩四首

阮籍生前慟黔婁死日貧素書遺稚子今事問何人泉
閔臺空夜阡開路豈春緇衣一以斂為謝洛陽塵

物化居然盡吾生詎有涯援琴堪灑泣展卷但興嗟大
被虛姜寢烏衣減謝家一乖棠棣詠幾欲罷看花

才高翻見伐曾是貴無能滿座思文舉同時惜彥升門
庭猶置筆帷榻尚懸燈祇自留遺草將誰訪茂陵

昔共懼娛地今來倍愴然隙駒驚電後行雁斷霜前易

悴同朝槿難回似夜川愧非摩詰弟含涕輯遺篇

送吳山人之洛川訪弟兼謁西亭王孫

聚糧何所適遠與故山違客路猶吟草王門欲曳衣行
攀楊柳別思逐鵲鴿飛莫作梁園賦淹留待雪歸

贈嚴叟

聞有君平隱湖山不易逢溪藏幽處塢雲合曉來峯啼
鳥閒中興馴鷗物外蹤尋君迷九曲花樹一重重

偶過長兄故齋作

一自空堂掩傷心今幾回故琴流水盡散帙任風開物
有先秋恨人同急景催徒看芳草合那復履綦來

吳吏部館聞陳氏洞簫

雅樂初調夏賓筵颯已秋將聲傳鳳翼合曲度鶯喉咽
處非關怨危時似寄愁翩翩公子宅直擬接秦樓

偶述

抗世跡長屏端居心自遐檢方尋五石行樂問三花歲
逝同流水顏衰欲駐霞不知車馬客何事滯京華

寄憶盛二仲文

與君何地別遙自舊京歸日日寒潮落年年旅鴈飛
山川白雲間烽火素書稀莫問平原宦幽情已拂衣

七月十五日頌孟蘭佛會

蕭晨凌上界孟月會中元綺供千花綴芳筵百果繁
流悲咽笙磬佇想現燈幡解脫徵冥理俱來聽法言

九日觀騎射同子約作

江東少年子結束逞雄材夜宿歌姬館朝登選將臺輕

颶連騎發彎月抱弓開二謝登高處聊同戲馬回

題山泉卷贈蒙侍御

雪水原標勝分泉更有名乘流逢世泰用汲荷王明
蘿月琴中調松風枕上聲夫君驄馬客三輔佇揚清

九日登半塘寺閣

舊識諸天界今為九日遊寒塘但蒼靄何處訪縑鐘
帶西林寺帆通近郭舟憑高攬風物搖落不勝秋

寄題沈儀曹虞山別業

虞山白雲際梁日樹長秋為託煙霞好因辭軒冕遊荒
臺仍舊葺涸井說新流不作郊居賦猶言似隱侯

哭洞庭友人陸梓二首

蒙叟能齊喪榮期了悟終一朝奄委化萬事若淪空問
字竒偏識臨書法最工今來隱几處長夜起松風
老就青山隱驚聞白日開貧交復存幾死友重嗟來僧
舍依為寢仙壇悶作臺臨流送歸處逝水竟無回

崑山道中延福寺逢琴僧

維舟探野寺取逕度溪橋宿雨鳴才歇寒雲濕未消琴
聲入林細幡影隔花遙流水原無著歸心緩落潮

寄宋大理

三輔平反久無寃定有謠年隨芳草換山間白雲遙花
色留潘縣鶯聲憶漢朝莫因辭賦苦宋玉鬢先凋

寄何白二儀制

帝里承恩日仙曹典禮時共趨門下省同草殿中儀文
藻推西蜀才華重左司鶯花春色速何處寄相思

送徐紹卿還洞庭兼訊方子

臨水朝來望還山西渡人柳情非遠道花恨是殘春
槁澤聊吟楚尋源若避秦祇應方處士白首共垂綸

題息機館

改館託幽居寧知卽敝廬塵清新解榻芸覆舊藏書
跡遠冥鷗外心閒賀雀餘何因機事少惟是抱玄虛

題項二秀才半華書屋

永嘉古名郡山水勝嘗聞幽館逢初構華峯已半分
亭

虛堪聽雨還密若迷雲康樂娛情處清輝直待君

送章參岳之蜀兼訊楊太史

移藩因重寄倚棹惜離羣路向巫山去江從巴水分鄉
書秋鴈達客夢夜猿聞聖代文誰似行當薦子雲

七月六日張幼于館燕別將赴豫章

祖席叨君燕蕭齋與客過旱雲涼思少江月旅情多著
作慙金馬遲迴戀薜蘿欲知臨別恨來日視星河

富春道中范憲副舟讌

已謝塵中鞅猶同使者舟清尊聊卜夜白髮幾悲秋
山色分蒼靄灘深遶急流獨憐垂釣處閒水自悠悠

鄱陽

鄱口曉來望潯陽路此通頽波銷霸業蔓草沒王宮
霧色香鑪上秋聲瀑布中禪心與遊思并落楓林東

贈既白宗藩

昔從開邸第常此集簪裾月似西園夜雲疑南浦初
遊梁先已倦入魏左頻虛別建藏書閣銜恩賜祕餘

贈龍沙宗藩父子

偶作洪都客因承清燕私
秋風蘭被坂夜雪竹交池
授簡何能賦吹竽謝所知
傳家自有學並善楚元詩

匡南宗藩別館

不識王孫貴翻同隱者流
池開半畝曲地即小山幽
霜冷蒹葭夕天長鴈鶩秋
何須章水上懷眺倚空樓

寄羅達夫於雪浪閣二首

一自看花罷俱為泛梗人
余棲吳苑月君卧洞門春
道

在惟宗魯文成欲過秦關山戎馬後何處嗣音塵
抗疏辭金馬談經就碧山閱川嗟浪逝忘世覺雲閒即
了期言下相逢恐夢間茲遊非泛雪詎作剡溪還

袁州九日

信美登高日宜春有舊臺花非吳地發鴈是楚天來郭
外千家盡窓中萬壑開此鄉多旨酒聊覆使君杯

與鄭司士夜話

故國經年別他鄉會面難人疑天外至花似夢中看山

瘴侵羶濕江流遠舍寒不知臺省客誰念一儒官

寄鄒謙之祭酒

予先子與其父為同年

曾覽先朝籍君家名與通著書稱馬走問道得鴻蒙歲

月別來久雲山歸去同幽居應不遠負郭即牆東

渠稱東郭

君

答張聚之惠問

六橋花下酒送子返柴居為別清秋暮相思章水餘塵

驅慙駟馬道遠望雙魚何處詢流寓匡山欲著書

寄子約桃塢別業

隱居思令弟行役愧予昆
花隔南州榻蓬深北郭門
委懷惟素帙寄興有清尊
鄉夢因之望時能到陸渾

宋之問第

三衢道中

山居無別業民俗半為農
樹杪開山閣溪灣置水舂
採薪朝候艇乞火夜聞鐘
歲晏收盧橘猶堪比戶封

庚申元日立春

常年同正旦今歲獨兼春
螢砌才抽莢椒盤併具辛
不

知顏歷後遇此幾何人拂曙蒼旂轉風光一倍新

虎丘北院

只疑山路盡別自隱叢林草綠知春半花飛覺雨深到
門餘野色燕坐得禪心一悟生公法傳燈直至今

送叔氏遊齊雲

新安春水綠乘興謁名山石磴和雲踐金庭就日攀暫
來辭竹下獨往出花間若遇壺中客應知得道還

送金憲使之蜀少隨父經此

蜀道遙天末巴江春水分嗟余遊少小送客想氤氲燕
坐琴臺月塞帷劍閣雲知君能諭俗無待長卿文
沈雲卿小
度巫峽後有一
想一氤氲之句

送孫生北上拜爵

生子當如仲孫郎更少年丹書藏秘府兵法守遺篇仗
劍都門外揚帆春水前銘勲會須早塞上正烽烟

吳山遇張幼于讀書僧舍

棲寺猶言近尋山入更深拂帷花作雨喧坐樹鳴禽乍

可辭塵鞅無須減照心西河索居意今日在東林

送宗兄擢憲之嶺南

南顧勞宸眷西曹特簡良行為持節使暫解尚書郎華
粵離筵散瓊崖別路長莫令庾嶺外音斷鴈來翔

王舍人邀遊故相文恪公園亭二首

東閣輕簪組西園盛履綦石聞窮海至花記洛陽移柳
色紫城合槐陰夾路垂吳宮清蹕水留作養鵝池

疏傳遺金少為園不買田樓臺卑綠野花石減平泉逕

草萋春雨城烏起暮烟臨池俱欲賦誰在鳳毛先

悼釋宗衍并示懋公

竹房一夕掩蓮宇幾時開乍禮新封塔空餘舊講臺香
飄林木變月落水禽哀為問傳心偈誰應更悟來

虎丘如公開齋寄贈

行苦能違俗心空尚閉關有時花自落何處鳥飛還觀
止風幡後禪叅水月間城居愧張祐春事隔青山

唐應德輓詩二首

卒于
揚州

矢心懷北闕扶病起東山迢遞蕭關外驅馳戎馬間龍
韜聊自試鶴馭竟無還落盡淮南桂悲來誰為攀

奄棄人間世空留海上營三軍齊灑泣一市罷言征凱
樂成蒿唱牙旗表素旌更聞遺草在猶是出師情

由罨畫溪登玉陽山院

溪水鏡中渡風帆畫裏看潭猶名玉女地即傍銅官向
夕山常雨先秋樹已寒洞霄供奉日歸隱聖恩寬

惠山簡汪沛

閉戶沈冥久尋山感慨生靈泉常淨色空梵亦秋聲花
雨行間濕松陰坐處清不逢雷處士臨眺獨含情

端威道院悼莊羽士素善琴

偶來芳草地更上紫霄峰出岫知今是尋源感舊蹤故
宮啼鳥雀落日下杉松一自琴亡後壺中遂不逢

送叔氏入京

客思輕千里官儀望五雲林間傾別酒菊下贈餘芬北
雪衣先授南鴻信早聞倘逢相識薦無忝晉徵君

赴崑山悼顧武祥

東山辭滿日北郭送歸年駐馬旌方舉鳴笳座已遷傷
心宿草地灑涕菊花天賴有徐卿子寧云似舅賢

悼過叟二首

吾友嗟凋喪斯人歎屢空高情非俗物隱跡是園公客
散茶烟冷丹銷藥火紅祇餘花徑在誰為掃春風

詎有容成術能躋衛武年春山聊別後朝露忽驚先櫬
向梁溪返旌從虞海懸平生竹林飲流涕酒壚前

送侯憲使之滇因悼楊太史

站嶺炎雲路盤江毒水津
君方遙奉使余是倦遊人
鄉淚猿聲夜離心柳色春
揚雄今物化芭也欲誰論

過張子

愁思何自遣寂寞訪張平
雪後持經坐花間抱甕行
感時聊復隱翫世已能輕
終日蓬門掩那知春草生

挽張允清二首

尚說遊名嶽寧期作逝川
銀臺非舊署石櫛是新阡
花

恨纔經月松悲似隔年夢迷元伯路驅馬詎能前
奄忽成捐館平生不問家旌書卿士貴簣稱大夫華草
聖留山寺萍踪斷海涯藏舟向何處那復是乘槎

送槃姪讀書竹堂寺

不遠違親舍尋幽就法堂夜禪寧避虎晨誦忽亡羊寂
滅銷塵想常明引隙光無令竹林賞春草遂荒涼

簡釋懋

齋聞何日閉燕坐罷春風五蘊方持戒諸緣頓悟空禪

參花雨後法喻鳥聲中自笑無安著將心問遠公

寶林寺訪徐紹卿疾不遇

客思因秋極禪心獨夜持乍來行藥處曾是散花時空
梵留支座殘經罷董惟東林但聞鳥日暮悵何之

寄項生校書

一自開東觀經年滯北畿再逢芳草合兩見朔鴻飛積
雪應穿履緇塵定化衣高樓如借問夫壻未言歸

皇甫司勳集卷二十一

欽定四庫全書

皇甫司勳集卷二十二

明 皇甫汈 撰

五言律詩

送蔡中丞之大梁二首

聞君歌赴洛暫此駐熊軒昔羨年方少今看位已尊
叢臺連魏寢戚邸半梁園不是夷門客何由慰贈言

臺端勞簡命河內佇宣風置坐同周處名亭次召公鄭

饑行盡給梁獄到應空可是工詩者誰云官並窮

寄東王一元美二首

一掬燕城淚聞君返故鄉
草間逢鹿擾松際有鳥翔
宦憶中郎省辭當七子場
名成身見累渾欲棄青箱
聞爾閒居日悲來賦未成
候門無雜弔西坐有餘情
淮水流難涸虞丘樹易驚
上書恩不貸感泣謝緹縈

余有二鶴忽失其一林伯寅得之慨然見還賦此

以謝

一謝乘軒寵棲田意頗同雄飛忽冲漢孤響但悲風翫
目慙支遁冥心託塞翁非君仗高義誰念楚人弓

孫生讀書道院兼示新詩因答

挾策青谿上垂帷晝不開雨忘流麥去霞記種桃來變
幻雲仙宅荒涼僞主臺興公奮嘉藻何異詠天台

送祖叟隨姚太史遊京

為重一言諾因輕千里心青門贈柳色白首念桑陰旅
跡蠅同附鄉書鴈莫沉平生抱琴德行矣惠知音

久雨

政虎聞由昔民魚驗自今五湖成大浸累月示恒陰避
世甘淪棄全身但陸沉何能上封事徒為賦愁霖

景王之藩恭述二首

帝胄宜承序賢王遂啓封珪分勞睿眷笙別愴慈容地
接荆衡勝人多宋景從行看江漢水何處不朝宗

綺歲占淵識冠年仰令儀邑鄰豐起處路卽代來時桂
樹新開逕芙蓉舊作池寧知飛蓋賞別有望陵思

送文司教北上

當宁崇儒教持經謁聖君
伏生猶未老揚子最能文
帳已同南郡書堪逼右軍
還憐竹林後見爾出雞羣

至後徐子見過

戶外久羅雀山中來故人
歸田嗟失稔避世笑同塵
榻解南州夜尊浮北海春
相看歲云暮坐惜物華新

送項生入京

為問西陵客何時發永嘉
路隨天外鴈舟泛雪中花
帝

典虞堪並皇圖漢未加行瞻天祿閣載筆振瑤華

春日訪大林和尚

投跡入空境看心媿此身綰巾蒙示結執鏡為宣因石
壁初消雪筠闌久滅塵坐來花落盡猶自不知春

黃氏中表邀余兄弟展其先塋

歲久川原改春深雨露思亂杉迷故道荒草沒殘碑往
化成千古榮名自一時寧知渭陽水流恨大夫池

經石湖登治平僧舍

野興臨湖上春光到寺中曲房巖際掩幽徑竹間通
水知流止看花悟色空同遊數王謝曾為訪支公

四黃子賦詩送釋印受戒之武林屬余奉同

幻跡無安著禪心任去留杯從一夕渡律向五時修
上竺多精舍西陵近沃洲題詩羨諸謝惜別為湯休

四月十四日

仙家無甲子吳俗紀生辰首夏蓬山會終宵脯棗陳
猶未滿莢月已漸成輪不見懸壺客何由覓異人

齒歎

齒錄非余望形衰祇自傷未須論舌在詎是為唇亡守
默渾無語歡歌漸有妨閨中罕靈藥何得似張蒼

雨省家園

梅雨淹時久桑陰拂夏長乍窺黃鳥換斷掃綠苔荒幻
跡非園客齊心似藥王朝來觀物後失養悟嵇康

悼樾上人

一自過春院鶯花悵別離寧知入定後忽是下生時懷

草人間帖支銘座右辭總諳無盡理那遣有情悲

汪子每書來言還齊雲未果賦此寄之

聞有歸與興如何久滯淫白雲遙引目芳草自知心客
鬢風霜改生涯歲月深移文謝猿鶴早晚北山岑

感事三首同子約作

寵易移宸眷言難悟聖聰幸逢止輦日真見引裾風開
閣人何在題門客已空徒聞賜歸傳詎比餞疏公

長夜猶酣飲平明已見收鷹鷂懷雅志魑魅幸生投勢

殆冰消日恩疎葉向秋成功自有序不去笑穰侯
妨賢應取咎履滿竟成災書上批鱗切辭陳舐犢哀瘡
煙蒙萬里風采動三臺獨惜平津館他時但草萊

題徐氏雲林草堂

選勝辭金谷探幽慕輞川近郊聊可卜初地不離禪風
景原塵外雲山即眼前徐陵多藻思來草玉臺編

張幼于廬墓

哀壑甘攷守荒庭罷鯉趨涕禽還自擾淚樹已全枯孝

里人題未安車使到無寥寥松際月弔影夜空徂

答陳司教

仲舉多推望吾門早有聲一羶從薄宦六籍引諸生芳
訊銜蘆達新詩揆藻成春風隔相與遙憶詠歸情

天池舊寺

不盡青山路行來豈畏深花間惜春暮雲際愜幽尋峭
石迴巒秀長松夾陞陰金河流梵處非復屬支林

春日虎丘遇何子

江上昔歸去山中今始逢花天重會面萍水舊行蹤幽
意闕春鳥禪心報午鐘閒來貪禮佛更喜得何顒

原明菴

猶厭東林擾重開西土幽山光分慧照溪水合慈流塔
影過松院鐘聲下竹樓從茲竟禪理爰淨更何求

悼黃得之

早共聞江夏今誰謁漢京未攄三策對曾草萬言成考
謚由賢媛留喪遲友生顏齡奚恨促不死是榮名

示內弟沈子

沈約郊居興今來吳市中移家因亂日懷土復春風
坦腹牀何在齊眉案已空憑將雍門慨一為寄江東

黃清甫之洞庭訪徐紹卿

湖上乘春棹山中問隱居病閒行藥後興減落花餘
客舍停雲久僧窓鑒月虛向來誰把臂應歎故交疎

悼汪子二首

尚記看花別俄隨落葉傾計疑千里夢交愴百年情
鄉

國無重返泉臺豈再明張堪妻子在誰為託朱生
懷歸曾未得委化竟何言城罷燕人泣江迷楚客魂總
惟非故榻絮酒異歡樽肯惜黃金盡惟餘詩草存

寄莫憲使

不覩魚中素寧知隔歲情一官聊自免萬事若無營
髮為辭劉白書因去趙成思君對煙草江上喚愁生

送吳子北上

顏訓家聲遠韋經世業存鳳毛新沐寵豹尾舊承恩
視

草供題翰攀花戀別樽
秋風南鴈起書為報青門

送靜公受戒還蜀

遊吳兼適越了自得塵觀
劍閣千盤險瞿塘五月寒
隨緣朝乞市說法夜登壇
西去乘杯別何曾蜀道難

吳純叔挽詞二首

京兆新泉路延陵舊世家
經廬聞訴笛登壠起悲笳
素業空遺草浮榮若夢華
同時裴馬客淚盡曲江花
年少推江左才高妬洛陽
向晨星落落歎逝水茫茫座

為亡琴冷苔因斷履荒楚魂招不返誰與擅詞場

寄張幼于廬所

舊卜徵君冢新題孝子鄉入林逢鹿死遶樹見烏翔坐處無青草攀時但白楊知君廢莪久揮涕不成章

九日書懷

卧病謝塵事堂陰感迅商懶成中散慢醒學次公狂菊向籬堪采松依徑久荒不知吹帽客何處醉重陽

贈汪元蟲自虎丘攜茶香歸歙

盧郎今更見荀令古來聞茶向僧齋乞香從佛供分聊
將白雲思靜對綠窓熏多少囊金者還家獨媿君

仲冬對月數宴答子約

冬煖因恒霽宵遊及望舒弓形雲際引桂魄露中疎棲
戀鷓鴣後思深蟋蟀餘清光能幾度再滿歲將除

送王子之太學

謁帝速征輪知君久席珍才華追大雅文體起先秦列
館槐陰畫園橋藻水春聖朝方養士莫作上書人

夜登靈巖

青山行處近白社到來稀
城化途猶是臺傾殿已非
香泉流壑冷花雨入林微
何事烏棲盡僧船載月歸

始登玄墓

鄧尉開山久輪王結宇深
湖光同練水梅樹即珠林
客興乘春霽僧齋過午陰
望中枝勿剪無礙是禪心

悼張聚之二首

憲也初非病桑乎竟是災
梁空聞燕語門掩見花開
總

帳春風冷藜燈夜雨哀從今斷雞黍那復故人來

居然花月在良友竟無存易下齊山泣難招湘水魂蓬
蒿仍舊舍松柏已新原扶醉因埋骨空思聽婦言

子約患臂奉訊

靜攝應無恙塵勞暫有虧才非類擁腫德或似支離燕
坐停琴後朝霖罷灌時向來觀化意翻訝肘生枝

送張幼于之南都應比

老至惜離羣時來此送君三山吳地盡一水楚江分率

敏工題賦衡思善屬文猶懷壯夫恥直欲樹奇勲

答徐紹卿見懷二首

停雲遙引望良晤近何疎以我丘中想開君湖上書花
飛人別後木落鴈來初祇為懷徐孺長令夜榻虛

芳歲無淹晷空山忽報秋時危平子歎日暮美人愁尺
素勞相憶雲蹤莫可求清輝惟共月猶自遲南樓

送清甫遊京師

少年輕遠別相送欲牽衣記室文章似平原肝膽非草

芳過楚歌花落渡淮稀更有帷堂恨霜時定憶歸

秋日王舍人邀遊支硎山同陸儀曹

同舟叨二客飛蓋此追隨峭石攢雲際疎林著雨時山
秋登更爽寺寂坐相宜何處堪禪悟寒泉獨在斯

哀弟子約四首

兩度悲兄淚今為痛弟流棣華翻委露池草竟成秋
內孤兒泣帷中少婦愁獨持遺草去恐有茂陵求

一官聊自免萬事若無營琴綜逍遙罷書詮道德成惠

連嗟令弟法護媿難兄何悟桃園賞重來異死生

稀世才難合憂時病易侵形全應驗玉藥誤為投金捫
雀生前選帝孤死後林却憐遺令日指李獨傷心

賓館綦方絕靈筵總忽張臨池留翰在撫座惜琴亡花
晝歡娛盡燈宵涕淚長猶言何水部詩思滿江鄉

李弟子約棄官東歸杜門却掃日延方士研味
道家之旨流覽衛生之經綜琴書以自娛或翰
墨之間作宜其享黃髮而躋上壽也豈意今秋

食鮮疾作伏床第者七旬捐賓客於一旦廣陵
絕響玄草徒存吁嗟悲矣藐茲遺孤艱以投我
悲悼又安可勝痛耶爰賦四詩哀心感者其辭
悽以怨但韻之而不能文之情也因似良友密
親請各賦之歌以永哀聊以泄吾思爾凡知子
約者必不能忘情抑烏能忘言哉

送王維楨還涇陽二首

王君與余為藝苑之交忝通家之誼彈冠仕路

二紀彌殷謝秩還山十年成濶雖音驛數聞而
光塵難即每懷良覲千里馳情乙丑春正上元
節後忽駕扁舟蹈積雪哀絰而來以志銘見屬
乃知厥考青山公辭養久矣相對於悒留歎決
旬晤言申旦是又悲中之一喜也明將別去聊
賦二詩遍眎諸友凡在同盟無忘占贈云爾
蕭齋避客處解榻遲君時稍覺形容改將無夢寐疑酬
心誰把劍攬涕獨題碑辭乏中郎妙空慙有道知

官跡一朝謝離心十載還旻天孝子恨風雪旅人顏夜
壑青山裏春帆越水間王裒枯樹在歸憶幾迴攀

二月十三日與楊中丞王舍人陸儀郎姚茂宰集

吳氏園亭

恒陰方決月寂寞過花辰不造河陽館安知別有春池
臺尚存故畦徑稍更新同是嵇公客當杯獨愴神

雨後靈澗寺觀梅寺乃梁時古刹有銀杏二株歲
久合抱矣

梁代叢林敞齊闕
澱水賒觀梅乘雨霽
問樹識年華
佛供移香淨
僧窓影月斜
夜深鐘梵起
飄處即靈花

妙華菴登樓望太湖

野寺人天外
危樓烟雨中
三山憑檻接
一水挂帆通
浪跡俱成幻
浮生併悟空
壯遊渾已倦
徒自愧長風

虎丘如公房追憶子約

重探支遁室
曾記惠連來
草色迷春夢
松聲起夜哀
居然隨物化
何自驗輪迴
獨惜題名處
殘碑半覆苔

天池遇劉侍御張文學留宿僧房余先返棹

獨往因春興相逢盡宿緣
散花初地雨施食午時煙
山月分歸照龕燈就卧懸
無言去與住諦想不離禪

贈陳子修道天池

塵累何能遣空門忽遇君
皈心叅繡佛戴髮誦靈文
頃落漁山月禪棲驚嶺雲
誰憐叔玄婦書去未相聞

徐翰撰遊齊雲歸因贈

蓬關雲中嶽花源洞口春
幽探歷山水玄覽出風塵
太

史遊何壯興公賦更新寧知香案更今是玉堂賓

春日同諸君虎丘餞別蔡司空分得可中亭

地選香臺勝亭間劍水春月華懸一鏡海氣儼重輪圓
缺看成幻升沉悟是因帝京千里共遙夜悵音塵

奉送再賦

向來遊宦侶試問幾人存暫駐東林駕因攜南浦尊臨
溪攀柳細遶塔落花繁訝得休公怨誰能不黥鬼

顧姊挽詞二首

化俗推慈範宜家著令猷行齊淑女伴才比丈夫流白
日開新兆蒼梧從故丘曾聞入朝語悟主在無求
禴翟生前寵金蠶死後藏絮風猶擬雪薤露已晞陽骨
化同埋玉竟銷詎返香淚來開故篋留取彥先章

訪顧朗生不遇

為訪山居勝門前一水分寧知牽世網未果謝人羣滿
徑翳秋草虛窓閒白雲非闌乘雪興了恨未逢君

題鍾山送幼于之白下

金定四庫全書
卷二十二
夜壑鍾山裏千秋劍舄存烟霞餘王氣霜露是深恩鼎
定周王業冠遊漢主魂相如從此去投賦謁文園

又賦雨花臺

多少南朝寺長干覺路分天花飛晝雨江樹隔重雲禮
塔鐙難滅臨臺日易曛莫因逢淨侶開社欲留君

燈夕答徐子

讌賞宵堪永流芳歲復還驪光疑泛海鰲火若浮山月
滿金枝上花生綺綴間無嗟成白首既醉總朱顏

新建徐文敏公祠季子見招展謁各賦

經始南城地恩開東海祠公車收啓事像寢儼容儀蔓
草成書帶桃花即絳帷將非過庭日猶幸得聞詩

重建雲隱菴

寶刹將傾日琳宮再構年佛餘迦葉地僧乏道林錢遶
塔徵前果沉灰悟宿緣願言功德就來問廢興禪

贈汪子

世事勿復說與君聊自寬感時蕭序改行路太行難明

月流杯暢清風拂劍寒并州何處是且當故鄉看

送朗公講解還越

月溪施錢修塔

開教逢鳩什談經得馬鳴坐中窺有相言下了無生法
雨和香氣天花落梵聲歸時多寶就刊石為垂名

贈張二守

飾吏更兼文關西迴不羣課登三輔最名向兩州聞慷慨
心傾日飛騰足致雲古來歌政樂今復見張君

送劉守備兵維揚

為邦有令名開府向江城鯨海無傳警狼山佇偃兵歌
同五袴美贈比一錢清獨惜隋隄柳春來綰別情

朱生將子遊太學

世濟由三事家傳自一經帝京初受館客舍尚趨庭槐
晝春飛雨花天夜聚星能令同學羨太宰舊儀型

四周寺訪吳山人

徒步起江東干時義氣雄倚鞍聊作賦投筆未銘功客
歲長途雪禪宵靜院風征西旌節盡門下泣何窮

贈異僧如金

幻術傳僧吒神光顯佛圖
貼危猶引足冒險似忘軀
木末同猿挂簷間學鳥趨
佇看多寶就會有百靈扶

黃清甫自京惠訊兼示新詩寄答

聞爾淹京國將書達故園
式微聊永歎長憶只空言
落木兼鄉淚飛花共旅魂
可能懷筆札更向五侯門

立春日同劉侍御集張幼于赤城山房

荏苒驚時序遲迴戀物華
隔宵林帶雨拂曙海呈霞
隱

跡原南郭辭流屬大家陽春何事早先遣筆生花

次劉守玄妙觀作

吏治聊乘暇仙源此暫過風光延眺迴雲物寄情多徑
密全遮桂谿深半繞蘿陽春何意早先入郢中歌

讀劉侯至日玄妙觀之作因贈

緱嶺郡城隅緣谿路稍迂自公移後乘攬勝駐前驅氣
動吹灰管靈探禮斗符興來聞夢得留詠在玄都

答章憲使

得罪因明主蒙恩念逐臣猿啼嶺表夜花發日南春共
就青山卧俱逢白髮新裁詩渾欲報往事不堪陳

范叅岳彌園讌集寄賦二首

閒閣懷先業為園慕隱居官遷四岳後情戀一丘餘野
鶴隨人鳥江鱸饌客魚由來聞嘯父玩世欲凌虛

沈約要題賦王筠會賞心徒然聞勝槩何自奉追尋振
策東臯遠開尊北海深祇應孫阮輩林木響清音

皇甫司勳集卷二十二

欽定四庫全書

皇甫司勳集卷二十三

明 皇甫汈 撰

五言排律

奉和家兄山中喜雪十二韻

憶昨天門雪飄颻下紫宸計時方社享協日已郊禋聖
主元無逸齋心況有神瑤花不隔夜琪樹自先春峻喜
譁馳道官儀儼從臣幸祠卑視漢登禪恥言泰萍澤遊

空豫桑林禱獨真叨陪扈蹕列曾奉屬車塵念子俱留
滯題詩更絕倫洛中應減價海內實遺珍黃竹賡歌意
青霄感慨身遙思文似者誰是薦雄人

夏至日天子有事于方丘小臣太學齋居作

鳳甸方丘峙龍輿大駕來赤旂承烈日碧殿淨氛埃天
上帷城建雲中幔屋開喜瞻周祀典忝竊漢英材暑謝
唐文避薰應虞舜催明禋宣室裏徙倚泮宮隈繒燎光
仍煥咸池舞更迴自非留滯客徒愴失趨陪

石崖讀書臺十韻為林中丞作

崖為高人峻林因勝地開逕迷春窈窕臺倚日崔巍傲
吏園堪詠愚公谷謾猜齋同一舫建峯並九華迴緗帙
雲常覆牙籤月故來辟非匡氏隙帳擬馬融裁竒問玄
亭字書藏柱史才仲舒帷不卷孟博轡仍催海內饒桃
李憲前任草萊無勞重懷土自有柏為臺

冬日游虎丘

故國殘冬返名山暇日遊攀蘿尋舊徑倚樹眺新樓洞

雪寒能積巖泉淨不流虎將金界湧龍抱劒光浮客向
空門散僧開慧室留已堪招白社何必訪丹丘

題高行人使琉球卷

奉使彤庭上頒封碧海隅天池凌浩渺星漢挂虛無雲
日龍宮幻風霆蛟壑呼扶桑標外域嘉樹在方壺綏化
遐難極論思蕩不殊波臣承玉冊水伯護金符米秀三
山近乘槎萬里孤即思枚氏發因頌禹王圖

挽張兵憲父母

長夜已難晨千秋痛二人文翁辭化蜀孟母罷遷鄰鏡
掩泉臺月穗凋鬢舍春藏經空似昔遺挂宛如新蒿唱
從茲就我篇遂不陳高門容駟入孝里見麋馴北闕還
堪戀南陔竟莫循餘榮與潛德并可慰霑巾

自曲梁移水部初入朝作

遙歸仙令駕重謁漢朝儀叨命分華省銜恩踐赤墀河
陽三載卧天闕九重思禁漏和鐘盡宮雲與仗移城綠
雙鳳轉駕擁六龍隨談樹仍今日栽桃異昔時筍班新

劍佩蘭署舊纓綏願並青霄侶常沾湛露私

五日集子安館中同賦

兄弟有輝光翻飛在帝鄉朝回趨建禮節賞遇端陽花
締金門萼鴻聯玉殿行辟兵同繫縷竊命並含香採艾
懸郎署分蒲引客觴詩慙稱小謝名忝繼元方晞露湛
恩渥披雲藻思揚常茲歡宴會無復夢池塘

北郊應制

坤紀德維貞乾行禮告成黃琮陳漢時赤玉應虞衡扈

蹕傳中道登裡望太清百花迎鳳輦萬柳駐龍旌日向
惟城遶雲從帳殿生薦圭祇貺假端慰睿情營

李伯華夜話有述

室邇更情親相過不厭頻月憐懽會夕花憶別離春得
御叨逢李交游幾託荀履將鳬在葉書斷鴈來秦露裊
仙人掌丹銷勾令神寧知龍劍合復以鳳城鄰蓬幄飄
零轉蘭堪把贈新攄章徒欲報含意詎能申

詠司中蓮花

爾是天泉種來分水署芳春花不競艷秋影自含香葉
以凝珠潔條堪攬翠長行歌臨衛浦言采憶吳鄉懽賞
從傾蓋幽懷學製裳將無託梅萼同此照何郎

送子安家兄遣告皇陵之中都

天授我高皇龍飛自禹方地曾留巨跡雲每識神光宅
鎬謀應協懷豐意詎忘遂荒湯沐邑因錮鼎湖藏園縣
祠官給泉闡烈考襄枌榆無馬鬣松柏有烏翔適孝今
王嗣恢圖中葉昌監周興禮樂稽古備文章觀德崇新

廟棲靈狹舊鄉卜工維日吉遐饋俟風將東省推予仲
南宮曰爾良春鄉遙獻節秋水速征航望氣荆塗上登
裡汝泗旁御香陳玉稅量幣發金箱別淚紛鴻鴈來歆
陟鳳凰故都行欲賦揚摧思何長

衣裳篇

皇甫子補吏水曹分署廊禁掌天子衣裳之制
凡遠方來貢獻者賜衣一襲臣訪司之黃扉直
暇作衣裳篇

在笥有衣裳我后受言藏來琛陳大輅獻雉自遐荒遂
化文身陋俱承黼領芳懷柔知帝念錫予見王章學製
微才忝裁成聖澤長象宜明敢作被服願無疆

秋日過慶陽伯宴樂園作

第是承恩賜園因選勝開像峭山並鑿穿渭水紫迴鳥
接平津散花移籞宿來曲旃疏繡戶懸榜跨瑤臺竇氏
方通客梁家更愛才綺羅高宴會珠履盡趨陪今日懽
猶續當年寵易裁從思漢城隱詎遣雍門哀

秋日寄憶子安兼懷子浚子約

漢殿祠官遣吳門游子歸
壽觴逢菊酒舞錦當萊衣
北闕情猶戀南陔願詎違
橋迴司馬柱庭偃樂羊機
玉季迎歌隸金昆對采薇
自慚雞每聽遙阻鴈同飛
草夢生春色星占聚夜輝
談應及省樹勿與報芳菲

秋暮述懷

坐使秋華歇行歌思不窮
鬢髮看從變緇塵笑屢蒙興
來言采杜跡往類飄蓬
薄祿何須戀微官亦未工時方

妬賈誼俗或誚揚雄解佩江堪涉乘查路詎通矢心同
喪馬結意向冥鴻用世甘瓠落還山棲桂叢

閱馬作

驃騎歸天育龍駒服義臺種多注水產獻或宛城來轡
以明珠飾裝將瑞錦裁擬金元逸足噴玉豈凡材弄影
盤花曲驕嘶繫柳隈黃池飲初罷御苑獵方迴不數周
王駿何言衛國駉北羣從此富西域未須開

詠清虛殿水簾

巧落銀河上輕垂玉檻前
瑩將珠比綴湛與露爭懸
晴作巫陽雨寒分太液泉
詎殊銜鳳日恍似濯龍年
影怯防鈎卷聲長雜漏傳
夜來承睿盼霑灑濕星筵

廣寒宮登眺

即遶后
洗粧處

寶閣凌霄建珠窓映日開
月臨疑桂宇露灑即銅臺
山悉圖嶠入池猶象漢迴
倚粧花屢發窺舞鳥能來
傾國元因色勞民豈但財
地隨時運改棟與美人摧
殷監良非遠秦宮亦可哀
聖朝留故蹟皇覽寔休哉

早春送太常殷簿考績還南都

來獻虞廷最歸典漢邦儀玉帛神如在旂常職所司椒
花餘別酒楊柳贈離枝新水浮征舸鮮雲拂去帷繁華
六朝地全盛兩都時遙想汾陰上猶憐太乙祠

彭城

鹿失咸陽上龍飛芒碭中天亡猶引恨地險竟成功壯
士歌方散哀姬泣未終一朝看感項四海罷從戎落日
荒臺在浮雲故壘空獨有滄江水流悲日夜東

呂梁

蓬轉歷徐方萍漂過呂梁
奔濤朝浴景流沫夜澄光
清濟疏源迴黃河引派長
天吳雲際發海若霧中翔
縈石神難鑿襟山險易藏
乘槎疑上漢捐佩似浮湘
未能觀不駭但遣泳相忘

永寧寺登木末亭

香刹侵丹漢禪亭結翠微
芙蓉懸寶塔鳩鵲影金扉
祇樹千雲覆靈花萬雨飛
綠深全隱馭紅密半遮衣
籟引

秋聲入鐙傳夜梵歸憑高覽虛寂真乘在芳菲

詠牛女

針樓降靈妃帳殿引仙娥待月臨鸞鏡行雲罷鳳梭春
心渺無限秋水悵相過廣樂陳銀漢輕車駕玉珂金飈
迴粉席珠露灑香羅乍至羞開扇將歸怯渡河翻嫌歡
晤促詎減別愁多花燭人間夜新知展若何

聞道

聞道柏梁災君王避寢迴金縣朝遂徹玉饌晝仍裁耀

德千官警明裡百辟陪南師謨不戰西域詔無開堯覽
留茨室文心罷露臺臣騫羞奉使邛竹詎須來

送大司馬唐公龍養母還山

司寇表陳情君王詔許行言歸拜家慶從此謝台衡後
乘遵鴻渚前旌舉鳳城謝安臥東野疏廣餞西京八座
夫人寵三遷令母名有懷桑景暮無恙板輿輕偕隱文
馬用閒居賦早成叢萱當戶發新筍傍船迎贈是山公
杖貽非穎叔羹壽觴歌白雪扇枕及朱明一奏循陔詠

都令鄉思生朝來散孔席余亦返柴荆

九日紀勝上李夏二宰相五十韻

同王廷幹作

御氣肇重陽徵期復際昌百揆藉元老一德頌明良丙
魏同興漢臯夔乃佐唐丹心熙帝載黑髮掌皇綱袞職
期多補台司表異常入朝榮劍履緯國粲珪璋雅望威
邊服嘉謨積廟廊泰階調玉燭玄籥啓金方颯颯輕飈
舉霏霏湛露瀼虹文亦已戢龍火遂司藏寒謝庭梧色
叢飄苑桂香人間逢九日天上儼三光晉接來樞掖恩

酺罷柏梁龍山帳前跡鳳甸眷時芳赤舄辭東觀華筵
列北堂言從戲馬路遙指問牛鄉麾協非熊兆幡懸並
鹿祥青門遵窳窳玄圃戾徜徉長樂通侯第平泉隱相
莊灌龍迴繡浦鳴鴈集瑤塘飛陞連阿閣交疏引洞房
章臺堪入畫金谷宛成妝西對燕山曲南鄰潞水傍芙
蓉紛冉冉荇帶藹蒼蒼逕轉疑彭澤園開類辟疆奇葩
千品綴珍果四時嘗葉密無援李林深有憩棠靈魚窺
豹飾幽鳥避麟裳假日登高會需雲樂宴張花從青女

獻酒訝白衣將寵佩萸房紫英餐菊蕊黃烹葵充寶饌
蒸蔥錯瓊粳禹膳傳頻錫堯樽薦未央仙肴飫脰脆雅
樂被宮商趙舞超方逸燕歌慨似懷鯢絃泛清瑟鳳吹
度朱簫攀石苔侵屐穿雲竹碍璫主前稱萬壽賓起示
周行遇井防投轄臨溪憶釣璜紉蘭滋九畹饁稼滌千
場鴻渚遊襟敞鵬霄眺思颺寧知升上宰猶爾慕羲皇
張組移歌席揮戈遶羽觴沙堤微鑒月煙術淨含霜筌
理冥都契機心坐忽忘悲秋感羈客覽物倦潜郎開閣

登瀛晚乘槎屬漢長驪駒留既醉蟋蟀戒無荒茲會佳
難再斯遊盛必彰誰能序終讌徒自愧雕章

詔獄二十句

一自嬰時網終宵若觸藩史遷幽請室公冶繫園門果
被儒冠誤從知獄吏尊夢多寧辨蝶淚盡詎聞猿易枉
虞翻跡難招宋玉冤徒聞懷楚奏未見理秦冤市遠應
投杼天高奈覆盆含酸對蛛戶急難望鵠原良璞捐仍
抱明珠盼尚存倘然蒙察識猶可報君恩

獄中聞齋居奉東子安十六句

沈憂悵往跡倚禍昧來端畫地何期入呼天獨未安自
憐收北海誰念繫南冠鳳或遭維繫鴿方待急難祇將
形弔影無由羽接翰池非斷芳草臺豈敗叢蘭望日微
須監飛霜夏亦寒徒懷宣室對坐使夜空闌

十一月十三日胥江汎月旋舸登城歸詠

寒江湛澄澈華月輝相鮮乘流載尊俎瀉影發樓船翠
巘合杳靄蘭皋帶長烟萬艘雜燈火千門紛管絃飛蓋

攬崇堞輟棹迴前川曾經故宮裏為照荒臺邊情非烏
棲夜跡是鹿游年登高與臨水行樂併悽然

哀張兩生

孝友悲張仲才華伯氏先憐茲雙白璧同爾閔黃泉薤
草何曾宿崇華遂不妍鴈飛春隴外鵲斷夜臺邊過客
徒懸劍生交或絕絃臨喪獨無涕齊物詎須年

觀虎跑泉

自昔開僧舍言疏禮佛泉忽從衡岳外幻涌越山前金

穴神龍吐銀牀善虎眠響幽宜間竹色瑞併成蓮定識
調心偈流知出世緣從茲功德水常普法華筵

廬山道中

漢江非遠竄廬嶽此經行陟險憑雲氣尋幽認水聲香
爐時隱現石鏡晝陰晴縱壑青蓮淨懸崖秀瀑明煙霞
一投跡松桂乃遺榮雅抱丘中想猶迷物外情將從逋
客謝徒媿昔賢名今夜東林月寥寥猿鶴驚

明遠樓

嘉運開文囿祥光引畫樓星疑聚奎野地似接瀛洲鳳
以飛甍起龍將刻柱浮梯雲遙入漢窓月淨含秋南嶽
神攸降長江藻並流懸知堯室敞應是楚材收

遊四祖寺

若夫嶽擅雙峯師稱四祖據蘄黃之上游迄隋
唐而獨盛訟牒暇日成服暮春侶狎向禽禪參
支許惟時兩稅方嚴衆僧莫聚鳥耘非幻鼠竄
為災龍聽法以猶來鹿銜花而自獻因探上乘

聊賦茲篇

談經聞四祖結宇在雙峯玄籥留真偈冥筌出慧宗招
提懸白馬欄梔架青龍泉落時浮鉢山深午罷鐘金河
遙證果石徑悉盤松屐往香泥印衣歸寶霧封同茲探
象教一為謝塵蹤獨惜僧徒散空堂客思慵

遊五祖寺

別有高僧因傳正印禪宮並建化域非遙夫支
遁愛山託名都而寄跡雲摩泛海遡定水以調

心仁智互樂彼我同情矣嗟乎余幼敦詩書長
叨軒冕然潘令誠拙崔宦奚工隱朝市而莫容
謫江湖而獨遠將欲入空門以投老登覺路以
啟迷受想徒嬰業緣未了幸茲歷覽安得亡言
說法俱成道尋山並起禪言由六銖契教以一燈傳峻
嶺標靈鷲香池吐異蓮金雲春不歛寶月夜恒圓檻涌
湘江水窓通廬嶽煙凌虛情更逸觀寂思愈玄自忝黃
州謫將尋白社緣寧知辭累劫即是渡迷川

觀音崖覽蔡子木題壁因賦

斷壑疏靈竇巉崖出異泉標雲因建刹閱水遂安禪琪
樹春將夏瑤花歲復年迴風度綠竹流沫綴青蓮定處
堪浮鉢鳴時或詠絃幽生香積裏寒落鏡光前客有同
心彥詩留寡和篇經過悵往跡歎逝在茲川

皇甫司勳集卷二十三